

Ken ta tuma ken haci?

Gobierno ta bay drecha caminda despues cu temporada di yobida pasa!

ORANJESTAD(AAN) Careteranan di Aruba ta na werki y pa lunanan largo caba gobierno a negligia su responsabilidad pa laga drecha careteranan.

Pa motibo di mal maneho y specialmente pa motibo di falta di placa, DOW no tabata haya suficiente placa pa por

cumpli cu demandanan pa drecha camindanan cu ta tur kibra.

Durante siman, gobierno a anuncia cu nan a reserva placa pa laga drecha camindanan y mientras cu tin temporada di awa seroe gobierno lo laga lapi camindanan so.

Despues di temporada di

awa seroe gobierno lo laga traha camindanan nobo!

Pueblo tabata puntra su mes ta kende gobierno ta kere cu nan ta tuma haci kens cu e ponencia, cu despues di temporada di awa seroe, nan lo cuminza traha caminda di nobo?

Na Hulanda, Merca y tur otro pais, departamentonan encarga cu obranan publico ta construi careteranan durante henter aña, den awa seroe, den sneeuw, neblina, den frio, den calor y te hasta den oranan di madrugada y ningun elemento di naturaleza ta stroba nan pa construi caminda.

Ta aki na Aruba so gobierno su departamentonan no por traha durante periodo di awa seroe?

Ta DOW su director y su personal atrobe mester bay carga e culpa di falta di placa?

Director di DOW a wanta demasiado culpa caba durante ultimo 4 aña di gobernacion y awor ta basta gobierno: bisa pueblo e cos manera cu e ta, no tin placa actualmente pa drecha caminda y punto!

Si awa sigui yobe henter aña, esaki ta encera cu camindanan na Aruba lo sigui ta kibra manera cu nan ta actualmente?

Lamentablemente pueblo di Aruba cu ta biba den un pais democratico no mag di cues-

tiona maneho di gobierno ora cu esaki na opinion di pueblo no ta bon, pasobra gobierno ta core bisa mesora cu ta pueblo ta negativo y negativismo ta malo pa Aruba.

Negativo ta ora cu pueblo tur dia ta worde confronta cu camindanan yena cu buraco y cu ta haci daño grandi na auto di hende y pueblo mester saca cada biaha placa pa laga drecha autonan cu kibra riba mal careteranan di Aruba.

DOW mester haya suficiente placa pa den pura cuminza drecha tur caminda na Aruba promé cu awa seroe caba cu tur caminda, pasobra despues di algun luna e daño financiero na careteranan di Aruba lo ta astronomico.

Gobierno mester cuminza baha gastonan cu nan tin cu coordinadonan y tambe cu viahenan di ministranan y parlamentarianan, pa asina haya placa pa drecha camindanan na Aruba cu pueblo ta haci uso di dje y drechamento di caminda mester haya prioridad riba snoepreisjes di politiconan.

ATA no por traha comunicado na Papiamento

ORANJESTAD(AAN) Pa esnan di exterior respeta nos pa loke nos ta y loke nos ta representa, nos mester siña respeta nos mes prome y sigur nos idioma Papiamento.

Na Solamente tres isla chiquito na mundo Papiamento ta worde papia y e hecho aki ta haci Aruba, Boneiro y Curacao islanan cu pueblonan unico na mundo.

Pa añanan largo pueblo di Aruba a bringa pa Papiamento haya e reconocimiento nacional cu e merece y tabata tin tur sorto di accion di apoyo pa nos dushi idioma Papiamento worde uza den tur sector.

Tabata tin Aña di Papiamento y hopi placa a worde inverti den stimula nos hendenan uza mas posibel e idioma Papiamento.

DIARIO semper tabata riba e baricadanan di bataya na favor di nos dushi idioma Papiamento y e batayan no tabata facil, pero a lo largo nos a logra di convence bastionnan convencional y tradicional pa bay over pa traha comunicadonan pa prensa na Papiamento.

Bastionnan convencional manera Ministerio Publico, Gobierno, KABNA y Marina Real a muestra respet pa nos Papiamento y poco poco nan a cuminza haci nan maximo esfuerzo pa manda tur nan comunicadonan pa prensa na Papiamento y ora cu nan no tabata por, nan tabata manda nan comunicadonan na Hulandes cu un disculpa pa e falta di Papiamento.

Esaki ta ser yama respet y ta ser mira como muestra di reconocimiento pa nos idioma na Aruba y pa esaki e instancianan aki ta haya tur elogio cu nan merece.

Tristo y bergonsoso ta cu nos mesun instancianan criyoyo manera por ehempel

den e caso aki, Oficina di Turismo di Aruba, esta ATA no ta respeta nos dushi idioma Papiamento y ta manda manera macaco comunicadonan na Ingles pa prensa local.

Den sector turistico tin un fenomeno di macakeria cu ta ingles tur Arubiano mester papia pasobra nan ta traha cu Mericanonan!

DIARIO semper a critica e actitud ridiculo aki den seno turistico na Aruba y te awe ta keda para riba, cu cualkier Arubiano cu ta menosprecia su mesun idioma pa haci

como si fuera ta di habla ingles e ta, ta haci daño na su mes y na su pais.

Bo no por pidi pa extranheronan respeta y acepta bo, si bo mes no ta ni respeta bo mesun idioma.

Tin hotelnan cu ta tene tur nan reunionnan na ingles y si mester bay analiza cuanto hende di habla ingles mayoria biaha tin sinta den reunionnan, anto hopi biaha no tin ni un habla ingles presente, pero tog tin un grupo di Arubiano cu kier muestra nan mes y na

Sigui lesa Pag. 48

SUNNY CHOLLERS!!

